

E P I T O M E.

Cum Turcas ad Senniam, quae in Pannoniae Regis ditione est, oppugnandam in Adriaticum sinum penetraturos, nunciatum esset; Veneti, aucta vigintiquinque triremibus, ad obstruendum sui maris aditum, classe, a suscepto consilio infestam gentem avertere. Matthias in Pannonia Novogradum de Turcis cepit. Strigoniam aggressus, quamvis satis prospera initio omnia habuisset, soluta obsidione, discessit. Jaurinum Turcis traditum est. Ad Regis Henrici clementiam aliquot Galliae civitates, quae in foederatorum manibus erant, confugere: ipse tandem Lutetiam ingressus, Parisensem Senatum in ordinem statim redegit: Vincentii Gradonici atque Joannis Delphini, Venetorum oratorum, legationem omnibus humanitatis ac liberalitatis officiis excoluit. A Joanne quodam Castello intentatum in ventrem ictum feliciter gena excepit. Poena de scario sumpta, Jesuitae toto regno ejeti. Uscochi ad latrocinia rediere. Mehemetes Amurathi successit. Venetiis diem suum obiit Princeps Paschalis Ciconia. Supremam Reipublicae dignitatem, duobus clarissimis competitoribus superatis, Marinus Grimanus est consecutus. Cenetenfium rerum, propter quas Veneti cum Pontificibus maximas discordias exercuere, origo & status hoc libro continetur. Pax cum Turcis per Leonardum Donatum instaurata. Multa a Christianis in Pannonia contra Turcas, compulsis ad ditionem oppidis, caesis exercitibus, prospere gesta. Ad Palmae substructionem, quo omne studium Senatus contulerat, novum vectigal impositum. Galliae Rex Pontifici tandem & Ecclesiae est conciliatus. Metus, ne ob expugnatam ab Uscochis Clissam turcici belli moles in Illyrici Veneti fines incumberet, recepta a Turcis Clissa, discussus est. Partae contra Turcas egregiae victoriae fructus ob militum avaritiam Germani amifere. Massilia, quae ad Hispanos defecerat, in Henrici fidem rediit. Ad continendos finibus suis Uscochos, eorumque latrocinia refrenanda egregiam Reipublicae operam Joannes Bembus praestitit. In Pannonia, detrectantibus Turcis pugnam, valde memorabile nihil gestum. Maurocenae Grimanae, Venetiarum ducissae, Rosam sacram Pontifex dono misit. Quae pericula totae Italiae impendebant, ob Ferrariensem ducatum, in quem Caesar Estensis, ab Alphonso Duce contra Pontificis iura heres relictus, invaserat, ea brevi, Pontifici Ferraria tradita, reque amice composita, evanuerunt. Bembus Novium castellum ad reprimendam Uscochorum audaciam cepit. A Caesarianis res in Pannonia contra Turcas prospere gesta: Jaurinum receptum; Buda capta. Clemente Pontifice Ferrariae degente, controversae inter pontificios ac Venetos de finibus obortae sunt. Cum Hispaniae Rege pax a Gallo facta est. Philippo secundo regi tertius Philippus in Hispania successit. Pseudosebastianus, Lusitaniae Regem ementitus, Venetiis in carcerem coniectus est. Cum nihil per colloquia apud Caesarem atque Archiducem de Uscochorum rebus proficeretur, multa Venetus terra marique contra ipsos molitus est. Turcis in Pannonia gravia a Caesareanis damna inflicta sunt. Avertendum alio Padum, novo effosso alveo, Patres censuere: Aloysius Georgius operibus praefectus est. Uscochorum latrocinia, sumpta a fontibus poena, atque ex Murlacae euripis egressu omnibus prohibitis, Caesar & Archidux sustulere. Galliae Rex bellum ob Salassios recuperandos Sabauda intulit: Mariam Mediceam, Hetruriae Principem, matrimonio sibi iunxit.